

Uunga siunnersuut: Inissiani attartortittakkani ineqarnermut tapiissutit pillugit Inatsisartut inatsisaat nr. xx, xx.xx 2015-imeersoq.

(Ilaqutariinnermut, Naligiissitaanermut Isumaginninnermullu Naalakkersuisoq)

Saqqummiussissut

(Ilaqutariinnermut, Naligiissitaanermut Isumaginninnermullu Naalakkersuisoq)

Siullermeerneqarnera

Naalakkersuisut matumuuna inissiani attartortittakkani ineqarnermut tapiissutit pillugit inatsisartut inatsisissaattut siunnersuut saqqummiuppaat.

Siunnersuuteqarnermut tungaviuvoq, ineqarnermut tapiissutit pillugit inatsimmi ineqarnermut tapiissutinik tunniussisarnerup nalunaarutitigut iluarsissuteqarsinnaanerup ammaaneqarnissaa. Attartortitsisut inissiat attartortittakkat akisoorujussuutinnerisigut aningaasaqarnikkut iluanaarujussuarsinnaanerat malittarisassani atuuttuni naapertuutinnilaq.

Naalakkersuisut isumaqarput ineqarnermut tapiissutit pillugit malittarisassat atornerlunneqarsinnaasariaqanngitsut. Ineqarnermut tapiissutit inatsimmi siunertarineqartumut, tassa inuit ineqarnermut akiliisinnaajumallutik ineqarnermut tapiiffigineqarnissamik pisariaqartitsisut ikiorneqarnissaannut atorneqassapput.

Attartukkanut immikkut ittunut ineqarnermut tapiissuteqartarnek politikikkut sammineqarsimaqaaq. Tassunga ilanngullugu Atassut Inatsisartut 2014-imi upernaakkut ataatsimiinneranni ineeqqanut ineqarnermut tapiissuteqartarnerup qanoq killilersorneqarsinnaanera pillugu Inatsisartut aalajangiiffigisassaattut siunnersuuteqarpoq. Taamaammat Naalakkersuisut nuannaarutigaa ineqarnermut tapiissutit pillugit inatsimmik nutaamik saqqummiussisinnaanertik, inatsit periarfissiisoq inissiamik taassumalu pequtsersugaaneranik eqqarsaatiginnilluni nalunaarutitigut ineqarnermut tapiissutinik assigiinngissitsisinnaanermut.

Siunnersuutip nassataanik aningaasanut killiliissutit il. il. pillugit Naalakkersuisut nutaamik nalunaarusiussapput.

Taamatut oqaaseqarlunga saqqummiussissut Inatsisartunut oqaluuserisassanngortippara.